

اليوم: ٢٠ شباط ٢٠١٩.
المكان: طبرجا قرب الكازينو.
الزمان: الساعة ١٢ بمنتصف الليل.
هيذا هو تاريخ اليوم اللي خلقت فيه من جديد.

كانت الدني عم تشتي كثير و انا راجع من قعدة مع رفقاتي. وصلت على طبرجا، قرب الكازينو، على مفرق قوي كثير. كانوا دواليب سيارتي تعبانين، فزحظت السيارة وفقدت السيطرة عليها كلياً.

بلحظتها، كان عندي خيارين: أو بفوت بالسيارة اللي حدي ويمكن أقتل حدا، أو جرب أبرم السيارة لثاني إتجاه، يمكن أضرب بالحديدة اللي بتفصل الأوتوستراد فمعقول توقف السيارة لخالها بأقل أضرار مادية و بشرية ممكنة. بلحظتها، همّي الوحيد كان ما أقتل حدا، و ما كون سبب جرح أو أدى أي شخص أو سبب بمأساته.

طلعت عالحديدة اللي بتفصل الأوتوستراد، ولقيت حالي على ثاني جهة منه. و انقلبت السيارة عضرها.

فعلياً، الوقت اللي أخذ السيارة تتنقلب عضرها هي بضعة ثواني، بس براسي ومخيلتي كانوا ١٠ دقائق. بهل كم ثانية، مرق قدامي شريط حياتي: شفت حالي مع أهلي ورفقاتي، تذكرت أحداث ما كنت بعرف انها موجودة و فيني اتذكرها. فكرت كثير بأهلي، وأمّي خصوصاً. كنت حاسس إنني رح موت، وإنه هيدي آخر لحظات حياتي.

خلص الشريط، و انتهى الحادث. صرت إطلع بحالي ونيش على اماكن الجروح، لأنه مش ممكن ما كون عم إنذف من شي محل. بس ما كان بني شي، ما كان صابيني ولا أي جرح.

إجى الوقت أني واجه الحقيقة بعد اكثر. فتحت باب السيارة و انزلت. شعور الخوف وقتها لا يوصف. كنت خايف من شو معقول يكون ناظرني برا من مشاهد.

طلعت من السيارة مثل الولد اللي عم يطلع من أحشاء إمه، أول شي عملته إنني بكي. ما بعرف ليش الولد يبكي لما يخلق، بس أنا كنت عارف ليش عم إبكي، عم إبكي لأنه بعدني عايش. كيف؟ ليش؟ ما بعرف؛ بس عايش.

حسيت فعلاً بلحظتها إنني خلقت من جديد، مش لأنني ما كنت راضي عن نفسي قبل الحادث، بس لأنه مش ممكن إرجع نفس الشخص بعد ما كنت هلقد قريب من الموت. شفت قديش الإنسان ضعيف، بأي لحظة معقول ينمحي عن الوجود، ويصير مجرد ذكرى. أول شي فكرت فيه هو كيف لازم ثاني نهار إرجع عنفس مكان الحادث الأليم، وسوق. مش رح إسمح يصير عندي خوف أو عقدة من ورا هالتجربة. وهيك صار، جيت ثاني نهار وسقت عنفس الطريق.

بعد هالحادث فهمت كثير أشياء، أولها إنه الإنسان ما بيعرف الموت، بيسمع عنه، يفكر فيه، بخاف منه، بس ما بيعرفه. المحزن و الغريب فينا كبشر انه ما منعرف قيمة حياتنا إلا ما نكون على وشك انه نخسر ها. ما منغير تفكيرنا و عقليتنا إلا ما نمرق بتجربة مربية، أليمة، أو مأساوية. و لكن يمكن طبيعة الإنسان هيك، ما بتتغير. المحزن بعد اكثر انه عايشين ببلد احتمال الموت فيه كبير، هائل! دائماً في احتمال حدوث انفجارات، اشكالات مسلحة، و اغتياالات. في احتمال فقدان أعز الناس على قلبنا بأية طريقة معقول نتخيلها. بعد (مجزرة) ٤ آب، عدد كبير منّا، كان قريب أو بعيد من الموت، قرر يعيد حساباته، يراجع نفسه و يعيد تعريف الحياة بمفاهيم جديدة و مغايرة. عدد كبير قرر يتبنى قضية و يكرس حياته لها.

بعد ٢٠ شباط، قررت ابني قضيتي. قررت كون عضو فعال بالمجتمع، اخدم مبادئي و طور حالي عبر انخراطي اكثر بناس و مجموعات بتشبهني و بتشبه قضيتي؛ تا ما ضلّ مجرد ذكرى. لأن بالنهاية، مين رح يحكي عنّا و يمثلنا غير قضيتنا يلي ناضلنا، تعبنا، و كرسنا حياتنا كرمالها؟ شو معنى الحياة لو ما النضالات و الانجازات الصغيرة يلي بتحاكي مبادئنا و افكارنا و قضيتنا؟ عم قول هيذا الشي كأو تقلك ما بقي تنظر تتعطي لحباتك معنى، اليوم فيك تقرر إنك تكون شخص فعال. فكر شو في شي بيعينك، تبني قضية ان كانت سياسية، إجتماعية أو إنسانية وكرس وقتك كرمالها. إذا كل واحد منّا بيخاد هيك قرار، قادرين نغير العالم؛ سوا.